



Betg main che 25 persunas èn veginadas undradas a la dieta dals chautegias al Plantahof per lur engaschi durant diesch onns enfin quatter decennis a favur da l'alpegiaziun.

FOTO ANDREAS CADONAU

Alpegiar cun sustegn digital

L'alpegiaziun grischuna è sa radunada la gievgia vargada al Plantahof. Ils chautegias e funcziunaris d'alp han retschavì blera informaziun dal Chantun e da la cussegliazion purila che pertutgan la proxima stad ed il futur da la alpegiaziun grischuna. In cun dronas e sistem electronic da localisar biestga.

ANDREAS CADONAU/FMR

«Las stgellas restan impurtantas.» La pura *Christine Gross* survigilescha ses 50 chaus biesga sitga durant la stad sin l'Alp Stockboden da Churwalden cun in sistem electronic. La mesadad dals animals porta in uschenumnà alptracker vid la stgella. In emettur che s'orienteschaa al sistem da navigazion GPS e che trametta signals da func via in server sin il telefonin ni computer da la pura. «Mia emprima egliaida è drizzada la damaun sin il computer per guardar nua che mes animals sa chattan.» La pura ha relatà la gievgia passada a la dieta dals chautegias al Plantahof a Landquart davart sias experientschas cun il sistem electronic da localisar la biestga. «El è in bun sustegn, na remplazza dentant betg la visita regulara personala tar la biestga.» E per chattar quella biestga exact al dretg lieu è la pura dependenta dals tuns da la stgella.

La drona controllescha il bigl

A Juf sin passa 2000 meters sur mar ha il pur *Dominik Menn* cumprà avant quatter onns ina drona. Cun quella drona po el controllar dus bigls che sa chattan sin la pastira d'alp. Il pur survegliestha sez sia muntanera che passentà la stad bain ad alp, dentant en la vischinanza dal manaschi da chasa. «Senza la drona stuess il pur ir trais quarts d'ura a pe per controllar ils dus bigls.» *Töni Gujan*, responsabel tar la cussegliazion purila per l'alpegiaziun, ha preschentà co che la drona levigescha al pur da Juf sia lavur da mintgadi da fanar e tuttina dar in'egliada sin ils bigls per esser seguir che l'aua cula. «Ils animals

«Mia emprima egliaida è drizzada la damaun sin il computer per guardar nua che mes animals sa chattan.»

Christine Gross, pura

èn disads che la drona sgola sur els ora.» Ch'ins sto dentant resguardar tschertas reglas e premissas legalas per laschar singular la drona han las explicaziuns dal spezialist da dronas, *Ueli Sager* mussà.

Proteczion da las auas chaschuna discussiuns

«Per il chantun è l'alpegiaziun in bain cultural impurtant che giauda gronda prioritad.» Quai

ha *Pieder Vincenz*, il schef da la partizun agraria entaifer l'Uffizi d'agricultura e geoinfurmaziun dal Chantun ditg la gievgia passada al Plantahof. El ha plendetà las novas propostas da la Confederaziun per firmar l'alpegiaziun ch'en actualmain en consultaziun. Pieder Vincenz ha era stuì defender las premissas da la proteczion da las auas che procuran per fastidis, principalmain als possessurs da las alps da vatgas. Divers votums han fatg attent che las prescripcions sajan memia riguras e strusch applitgablas per ils possessurs da las alps, per regla las vischnancas. «Las pretensiun per la proteczion da l'aua èn la frida mortala per bleras alps da vatgas.» Suenter quel votum or dal numerus plenum da la dieta dals chautegias ha Pieder Vincenz avertì da mantegnair la sauna raschun. «Sin bleras alps da vatgas èsi vegni investì bler ils onns passads ed ellas sa chattan èn bun stadi pertutgan la proteczion da las auas.» Il schef da la partizun agraria ha regurdà ch'il Chantun sa dettia bregia d'applitgar la lescha federala cun mesira. «I nun è magari simpel da coordinar la proteczion dals animals cun las pretensiuns da la proteczion da las auas.»

Tradiziunalmain vegnan undrads a la dieta dals chautegias ils funcziunaris e pasturas e pasturs d'alp che han lavurà durant blers onns per las alps grischunas. Betg main che 25 persunas èn veginadas undradas da la sezioni grischuna da l'Uniun alpestra svizra. *Kasper Nicca* per in engaschi da 45 onns, *Peter Gadien* da Trimmis per 43 onns, *Eveline e Reto Casanova* per 30 onns, *Josef Thalmann* da Zignau medemamein per 30 onns.



Dronas simplifitgeschan la lavur sin las alps.

FOTO MAD